

Ukama

UKAMA

PANOPERA CHIDZIDZO UNOTARISIRWA KUNGE WAVA KUGONA

- Kudoma ukama hwevanhu vemumhuri nemabasa avanoita.

Ukama hwemumhuri

Ukama hwedu pachivanhu chedu hunotangira pamhuri.

Mhuri inotangira pavanhu vaviri vanenge varoorana, vogara zviri pamutemo, poberekwa vana, vana vaye voberekawo vana vavo zvoramba zvichienda zvakadaro.

Vanhu vaviri vatanga kuroorana ava vane madzinza akasiyana okuti dzinza rekwababa nerekwamai.

Nokudaro vana vachazvarwa nemadzinza maviri aya vane hukama kubva kumadzinza maviri aya.

Mhuri inotora zita redzinza rababa kwete zita rokwaamai.

Hukama unhu hunenge hwakunzi ukama hwedzinza.

Muhukama uhu hamurooranwi nekuti vanhu vamwe vane mutupo umwe chete.

Vanenge varoorana panotobviswa mombe chena isina kavara inonzi mombe yechekaukama kureva kuti hapasisinai ukama kuvanhu varoorana ava.

Hukama kubva kuna Baba

Kana takanangana nekuna baba hukama hunotangira pana baba vababa vanove sekuru.

Touyazve pana amai vababa vanove mbuya.

Tine mukoma wababa anove babamukuru. Panozoita hanzvadzi yababa inove tete kana kuti samukadzi.

Tine mukadzi wababamukuru anove maiguru.

Kunouyawo munin'ina wababa anove babamudiki nemukadzi wacho anove mainini.

Murume wavatete muramu kuvasikana asi woita mukuwasha kuvarume nokunamai nambuya.

Vana vababamukuru nevababamudiki vakoma, vanin'ina nehanzvadzi. Vana vavatete vazukuru kuvarume voitwa vana nevasikana.

Hukama kubva kuna Amai

Baba vaamai ndisekuru uye mai vaamai ndimbuya.

Hanzvadzi yamai ndisekuru mudzimai wavo ari mbuya.

Munin'ina wamai ndimainini uye murume wavo ndibabamudiki.

Mukoma wamai ndimaiguru murume wavo ari babamukuru.

Vana vamaiguru namainini vakoma nevanin'ina nehanzvadzi.

Vana vehanzvadzi yaamai ndanasekuru nanamainini.

Ukama kubva munharaunda

Ukama uhu hwaitangira pakugarisana kwevanhu munharaunda.

Vanhu vaitevera mhuri ine tsika dzakanaka dzisina ngozi.

Vanhu vaigona kuroorana munharaunda yavagere hukama hwototanga.

Hukama uhu hwaisunganidzwa nokukudzana sezvo vanhu ava vaive vasina mutupo umwe kana vabereki vamwe.

Pfungwa huru apa yaiva yokuti mudiki wose anokudza munhu mukuru achitanga kumukwazisa.

Munhu wose ane zera rababa vako ndibaba uyo ane zera ramai
vako ndimai rasekuru ndisekuru rambuya ndimbuya zvichidaro.

Humwe hukama hunobva munharaunda hwakakosha ndehwechisawira.

Uhu hukama hokuvigana pakugarisana kwenyu.

Mumwe anogona kungoti kana ndafa ndovigwa neshamwari yangu husawira
hwototanga.

Pasichigare vanhu vaisorana husawira.

Waibika doro nokuuraya mombe wopa munhu wauri kuda usawira naye.

Doro riya pamwe nenyama inonzi hunda zvadyiwa nekunwiwa zvaitaridza
kutanga kweusawira.

Apa zvoreva kuti unoviga hama dzomunhu iyeye iye achiviga dzakowo.

Kana kuri kutukana unotukana nehanzvadzi, vana, vakoma vanin'ina vanababa
nemadzitete emunhu wawasorana naye husawira.

Pahusawira hautukane nemukadzi wemunhu wawasorana naye uye nevanhu
varoorwa mumusha uyu nokuti ndanaambuya vako.

Kugadzirisa makakatanwa mumhuri nemunharaunda

Makakatanwa kusawirirana kwevanhu pamusoro pezvime zvinhu.

Vanhu vanogona kukakatana pamusoro pemuganho wemunda, chipfuyo kana vana
vamitisana uye kana zvipfuyo zvadya mumunda.

Saka pakaita kusawirirana panoita kukakatana vanhu vatadza kuwirirana.

Kana muri mumba baba namai vakapesana vaienda kwavate vanove hanzvadzi
yababa vababa kana kuenda kuna vate vanove hanzvadzi yasekuru baba vaamai.

Kana tiri vana tinoona vakoma vedu, kana zvaramba toona baba namai,
zvikarambaze toona vanasekuru kana vanambuya nanavate nyaya
dzogadziriswa.

Mumhuri zvakare vana baba vakanetsana baba vavo ndivo vanovagadzirisa asi
kana zvaramba panosvika sawira kuzopedza daka iri.

Pachivanhu chedu hapana nyaya inotadzwa nasahwira kunyangwe zvoita sei.

Kana ari makakatanwa emunharaunda Sadunhu kana kuti Sabhuku ndiye anotanga kugadzirisa vanhu vashupana kana zvaramba yoenda kuna Mambo.

Mazuva ano pane dzimwe nyaya dzisingadi Sabhuku kana Mambo asi dzinonanga kumapurisa.

Nyaya dzakanangana nokuuraya, chibharo, kushungurudzwa kwevana uye kubiwa kwezvipfuyo ndedzemapurisa.

Mibvunzo

Tsanangura ukama huripo pakati pako nevanhu vanotevera

- 1.Mai vababa vako
- 2.Mwana wemwana wavatete vako
- 3.Mwana wehanzvadzi yemurume wemukoma wako
- 4.Hanzvadzi yasekuru vamai vako
- 5.Mwanakomana mukuru mumba menyu
- 6.Baba vamai vako
- 7.Mwana wemukoma wababa vako musikana
- 8.Hanzadzi yomurume watete vako
- 9.Mwana wemukomana wako
- 10.Murume wemwana wababamukuru vako ,murume watete vako